

PRK Kajang: Anwar Tanya Khairy 'Jika Anda Pakai Jersi MU, Adakah Anda Dari Manchester?'

mStarOnline

Februari 04, 2013

Oleh RASHVINJEET S. BEDI

KAJANG: Ketua Pembangkang, Datuk Seri Anwar Ibrahim membidas Menteri Belia dan Sukan, Khairy Jamaluddin yang menyindir beliau kerana memakai jersi pasukan Selangor pada satu majlis baru-baru ini.

"Menteri (Belia dan) Sukan tanya saya kenapa saya pakai jersi Selangor apabila saya dari Pulau Pinang. Saya nampak orang pakai jersi Manchester (United)... adakah mereka dari Manchester?," katanya yang menggamatkan Dewan Komuniti Taman Mesra di Kajang.

Khairy merupakan penyokong pasukan Manchester United.

Anwar, yang merupakan Ahli Parlimen Permatang Pauh turut berkata bahawa beliau tinggal di banyak tempat di Malaysia termasuk Kuala Kangsar.

"Saya turut tinggal di Kamunting selama dua tahun," katanya yang berseloroh kerana merujuk mengenai penahanannya di bawah Akta Keselamatan Dalam Negeri (ISA).

"Saya juga pernah tinggal di Selangor selama berpuluh-puluh tahun," tambahnya.

Dalam ucapannya, Anwar turut mengambil kesempatan mengulas mengenai cadangan supaya jaguh badminton negara, Datuk Lee Chong Wei bertanding untuk menentanginya di pilihan raya kecil (PRK) Dewan Undangan Negeri (DUN) Kajang.

"Jika dia bertanding, saya akui kalah... dalam badminton. Saya merupakan peminat beliau dan sering menonton perlawanannya.

"Saya sering mendoakan kejayaannya. Saya fikir beliau juga akan mendoakan kejayaan saya dalam pilihan raya kecil ini," katanya yang sekali lagi menggamatkan suasana dewan.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2014/2/4/mstar_berita/20140204140343&sec=mstar_berita

